

廣文書局
印行

史料
編六

盧龍塞略
(上)

明・郭造卿撰
郭應寵編

史料
六編

盧

龍

塞

略

(附圖)

(上)

廣文書局印行

中華民國六十三年六月初版

史料
六編

盧龍塞略

(附圖)

精裝上下冊定價：新台幣七百八十元

版權所有
不准翻印

撰者 郭 造 卿

編者 郭 應 寵

發行人 王 道 榮

發行所 廣文書局有限公司

臺北市羅斯福路二段九號之三
郵政劃撥二一九九號
電話三四九六六〇號

經銷者 全國各大書局

內政部出版業登記證內版台業字第一三二四號

口關東邀歸路至菁子谷炒蠻四十餘騎伏爲
我擒八名遂遁追至三岔口虜五六百餘騎戰
擒五名殺二名虜傷乃奔所獲馬駝器甲多兵
死者一人中軍把總有傷重者暮引師還其擒
夷老起等十三監于古北口衛壬寅日入西北
三百餘騎至青山口迤西半伏半臨牆竊犯臺
官督兵堵退路將張爵追至荆林離邊九十里
虜二百餘騎迎敵用火器擊傷獲三顆馬十匹
夷器五十七事救回被虜一人燕河兵亦至乃

遁三月丁未上曹家寨功請革炒蠻壁只撫賞
問罪招貢如常例犯臺頭東勝寨有追剿斬獲
功四月丙子朔擒虜七人越獄次日獲二人問
監守等罪路將革任兵備罰俸大嬖只挨台必
等率部落千餘騎叩古北口關謝罪并獻所奪
十二人以贖擒夷鑽刀如舊例而加黑狗血及
骷髏令軟執而誓曰不改作逆者如此癸巳有
詔賞萬刀兒志大赤二夷以曹家寨先報也七
月戊申制赦炒蠻等罪開賞放夷歸再犯獲卽

梟示如逆情重大卽請兵誅剿癸丑以夷人兀魯思罕等言前貢入京序班梁士元尅其賞物食物革冠帶罰俸治罪是月賞曹家寨功八月癸未長昂至喜峯口關外自阻貢革賞嘗欲納款以罪不敢乃托青把都求宣府撫院差通官通丁同青把都差黃夷四名與長昂率領額只尅等五十一家夷酋百餘名部落老少幾萬數到關認罪乞賞中路副將及路游擊陳忠等臨關詰問宣府通官等遂傳長昂至關下自稱奴

婢詞亦悲哀大意欲加賞且代諸夷求索責之
彼雖無詞以乞賞爲名而猶未決時炒蠻亦在
諸將諭云汝方在古北宥罪其恩何如尚不感
激亦與長昂同心耶炒蠻有感已丑先將貢入
如常撫待遣出諸夷聞其得頭貢咸將馬併進
長昂遂與諸夷爭道入收正貢補貢馬共三百
三十九匹明日又收正貢補貢馬五十七匹制
夷酋旣服罪乞哀准赦宥照舊撫賞其已獲未
獲俱宥若再犯照王杲例卽便會官夾剿掃蕩

巢穴不許再爲乞請庚子寄監薊州衛賊夷越
獄先是黑撒石亥兄弟部落時在牆馬邊外梗
捉尖丁挾賞路將出追剿獲之并其次男哈喇
等五人奪回尖丁乃監其父子爲質餘賊放還
哈喇越禁逃出寬佃谷口外坑石兒地離關四
十里九月甲辰朔尖丁遇之復獲以歸十月丁
亥討賞屬夷在洪山口外捉夜不收官一員傳
烽提調追三十里外巡檢司斬獲三顆獲馬十
九匹及器餘北遁我兵戰死一人傷十餘人馬

騾死傷十餘匹所提官至流河越四日脫回十
二月丙子虜五萬突犯遼東前屯新興等堡薊
遼併力拒堵斬獲四顆虜是日出境奉制兩鎮
文武將吏協守却虜功同斬馘賞賚有差總理
加少保

八年閏四月癸亥諜報長昂部撫賞原在董家
口關或于青山等口放牧就討酒米需自并入
喜峯絕來往放牧者於本關口外不給今將求
仍舊提捕以挾我故議撤春防且止五月己丑

五鼓哈折卜賴竊入青山口正關殺把總夫婦
墩軍傳烽卽回董家口提調張式以零賊少率
兵出青山口追之三屯營游擊劉世桂南兵游
擊陳蚕隨之及明副總兵史宸亦出董家口喜
峯游擊陳忠從貢關出世桂等至熊窩頭伏起
多傷虜瞭師復至而去宸等合追至衚衕前川
虜棄食而去追之都山正北之兀赧陽兔離邊
二百餘里距夷巢六十里且暮劄營虜從迂路
回尚未至巢夷婦聞有奔逃矣四鼓率師還至

歡喜顧總理聞報調兵策應于青山及昏進口
人馬疲乏死傷多時暑雨草深林密溝澗縈紆
師衆莫施故窮追不得一級而不殲師亡將天
幸矣六月己酉總督請治諸將俱革任式守備
不設且輕出誤師當論死比古壯薛虎臣充軍
式善書寢凡報事驚寤者重責因而偵卒報警
侍卒不敢爲傳至倉皇致諸將失措免死偵卒
乃以失報斬在律諸將不固守及守備不設並
斬昔庚戌潮河川而本兵以斬及王總督以守

備不設失陷城池律論况邊關之專任乎蓋守
關論不固而提調論不設乃備之于平日而弗
失于一旦茲又幸免援例者衆提調因不備有
侵尅以致踈虞守關不敢與抗失事專問死徒
矣

九年五月辛未三鼓屬夷阿只字來五十餘騎
犯白羊峪關擦崖子提調郭遇卿堵退之

十年總理戚繼光調任廣東去楊四畏代

十一年二月辛亥朶顏勾西北虜二萬餘犯遼

東錦川營至沙河驛用火器退敵六月乙卯大
嬖只土蠻百餘騎殺尖丁十一人掠十七人分
二股一由東大川一由西潮河南下奪馬百七
十一匹總督叅古北路游擊戚金檀開關門牧
放馬匹私投軍人採板販賣致賊竊窺伏兵殺
掠原無對陣奪回馬匹及潮河川司馬臺提調
蕭汝蕙陳泰泰以石工冒官貪淫有跡革究協
守兵道罰俸革大嬖只撫賞六月乙亥夷首小
阿卜戶犯曹家寨黑谷關從水口潛進分攻寨

堡殺管隊軍人五名虜男婦三十餘傷軍二十餘男婦十餘及天明諸將始知而賊去無踪矣協守陳文治同游擊李尚賢捷報鎮道上督撫官軍奮勇拒堵將文治等叙錄巡按李植訪虜襲破關寨殺虜軍民及破燒香等四五寨請治將領隱匿欺罔督撫申辨遣御史江東之會植再勘文治令守堡官將殺屍移關外埋燒禁親屬不得悲泣御史發九屍視俱係砍劈請治文治等罪制鎮降一級督撫罰俸半年令植究問

論文治尚賢罪死及文治侵欺沿邊贓二萬兩
奉旨文治貪惡異常又肆行欺罔下都察院議
守備不設爲賊所掩襲因而失陷城寨者斬仍
照例梟示子孫不允承襲原冒功世襲薊鎮自
庚戌後鎮協等官多欺罔幸脫此舉大快公論
也

十二年七月辛丑巡撫張國彥上招徠被虜華
人以散逆黨并陳討虜屬夷疏切中夷情機宜
言三衛屬夷不過八十餘種內惟長昂董忽力

大雙只馬荅哈炒蠻小阿卜戶兵力稍盛謂之
六克總計部落不滿萬人時長昂董忽力犯邊
革賞癸卯竊犯臺頭路葛藤峪守臺官兵放火
器遁回八月甲辰朔長昂部千餘騎自麻地谷
起營百餘里四更到劉家口琵琶稍臺折牆二
處百餘步入二里下莊殺居民六人傷五人遇
南兵對殺斬三顆得器五百八十七事賊自原
牆出口擄去四十三口及牛畜三十五頭尋尾
獲傷夷二顆遺器二百六十六事陣亡兵八名

傷兵一百二十二員名馬死傷八匹至老鴉嶺
而回董忽力在喜峯關討賞聞傳烽而逃矣督
撫請將劉家口失事把總李養性等守臺失更
烽軍以軍法論游邊懸示其首功陣亡如例南
兵游擊路宰等冒功優賞紀錄賊雖出口傷多
鎮道坐新例不問部覆令戴罪俟秋防議奏防
畢奏副總兵楊紹勳等功贖制可

十三年五月丙辰虜夷趕兔於曹家口路平頂
以殺守空軍六人七月丙戌殺黑谷關外尖丁